

印光大師鑒定

黃智海居士述

阿彌陀經白話解釋

蘇州市靈岩山寺

印贈

印光大師鑒定

黃智海居士述

阿彌陀經白話解釋

蘇州市靈岩山寺 印贈

佛說阿彌陀經

姚秦三藏法師鳩摩羅什譯

如是我聞。一時佛在舍衛國祇樹給孤獨園。與大比丘僧千二百五十人俱。皆是大阿羅漢。眾所知識。長老舍利弗。摩訶目犍連。摩訶迦葉。摩訶迦旃延。摩訶俱絺羅。離婆多。周利槃陀伽。難陀。阿難陀。羅睺羅。憍梵波提。賓頭盧頗羅墮。迦留陀夷。摩訶劫賓那。薄拘羅。阿菟樓駄。如是等諸大弟子。并諸菩薩摩訶薩。文殊師利法王子。阿逸多。菩薩。乾陀訶提菩薩。常精進菩薩。與如是等諸大菩薩。及釋提桓因等。無量諸天大眾俱。

爾時佛告長老舍利弗。從是西方過十萬億佛土。有世界名曰極樂。

其土有佛號阿彌陀。今現在說法。

舍利弗。彼土何故名爲極樂。其國眾生無有眾苦。但受諸樂。故名極樂。又舍利弗。極樂國土。七重欄楯。七重羅網。七重行樹。皆是四寶。周而圍繞。是故彼國名爲極樂。又舍利弗。極樂國土。有七寶池。八功德水。充滿其中。池底純以金沙布地。四邊階道。金銀琉璃。玻璃合成。上有樓閣。亦以金銀琉璃。玻璃。磲磔。赤珠。瑪瑙。而嚴飾之。池中蓮花。大如車輪。青色。青光。黃色。黃光。赤色。赤光。白色。白光。微妙香潔。舍利弗。極樂國土。成就如是功德莊嚴。

又舍利弗。彼佛國土。常作天樂。黃金爲地。晝夜六時。雨天曼陀羅華。其土眾生。常以清旦。各以衣祴。盛眾妙華。供養他方十萬億佛。卽以食時。還到本國。飯食經行。舍利弗。極樂國土。成就如是功德莊嚴。

復次舍利弗。彼國常有種種奇妙雜色之鳥。白鶴、孔雀、鸚鵡、舍利、迦陵頻伽、共命之鳥。是諸眾鳥。晝夜六時。出和雅音。其音演暢五根、五力、七菩提分、八聖道分。如是等法。其土眾生聞是音已。皆悉念佛、念法、念僧。舍利弗。汝勿謂此鳥實是罪報所生。所以者何。彼佛國土。無三惡道。舍利弗。其佛國土尚無惡道之名。何況有實。是諸眾鳥。皆是阿彌陀佛。欲令法音宣流。變化所作。舍利弗。彼佛國土。微風吹動。諸寶行樹。及寶羅網。出微妙音。譬如百千種樂同時俱作。聞是音者。自然皆生念佛、念法、念僧之心。舍利弗。其佛國土成就如是功德莊嚴。舍利弗。於汝意云何。彼佛何故號阿彌陀。舍利弗。彼佛光明無量。照十方國。無所障礙。是故號爲阿彌陀。又舍利弗。彼佛壽命。及其人民。無量無邊阿僧祇劫。故名阿彌陀。舍利弗。阿彌陀佛成佛以來。於今

十劫。又舍利弗。彼佛有無量無邊聲聞弟子。皆阿羅漢。非是算數之所能知。諸菩薩眾亦復如是。舍利弗。彼佛國土成就如是功德莊嚴。又舍利弗。極樂國土眾生。生者皆是阿鞞跋致。其中多有一生補處。其數甚多。非是算數所能知之。但可以無量無邊阿僧祇說。舍利弗。眾生聞者。應當發願。願生彼國。所以者何。得與如是諸上善人俱會一處。舍利弗。不可以少善根福德因緣。得生彼國。舍利弗。若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛與諸聖眾。現在其前。是人終時。心不顛倒。即得往生阿彌陀佛極樂國土。舍利弗。我見是利。故說此言。若有眾生聞是說者。應當發願。生彼國土。舍利弗。如我今者讚歎阿彌陀佛不可思議功德之利。東方亦有阿

閔鞞佛、須彌相佛、大須彌佛、須彌光佛、妙音佛、如是等恆河沙數諸佛、各於其國出廣長舌相、徧覆三千大千世界、說誠實言、汝等眾生、當信是稱讚不可思議功德、一切諸佛所護念經、舍利弗、南方世界、有日月燈佛、名聞光佛、大燄肩佛、須彌燈佛、無量精進佛、如是等恆河沙數諸佛、各於其國出廣長舌相、徧覆三千大千世界、說誠實言、汝等眾生、當信是稱讚不可思議功德、一切諸佛所護念經、舍利弗、西方世界、有無量壽佛、無量相佛、無量幢佛、大光佛、大明佛、寶相佛、淨光佛、如是等恆河沙數諸佛、各於其國出廣長舌相、徧覆三千大千世界、說誠實言、汝等眾生、當信是稱讚不可思議功德、一切諸佛所護念經、舍利弗、北方世界、有燄肩佛、最勝音佛、難沮佛、日生佛、網明佛、如是等恆河沙數諸佛、各於其國出廣長舌相、徧覆三千大千

世界說誠實言。汝等眾生。當信是稱讚不可思議功德。一切諸佛所護念經。舍利弗。下方世界有師子佛。名聞佛。名光佛。達摩佛。法幢佛。持法佛。如是等恆河沙數諸佛。各於其國出廣長舌相。徧覆三千大千世界。說誠實言。汝等眾生。當信是稱讚不可思議功德。一切諸佛所護念經。舍利弗。上方世界有梵音佛。宿王佛。香上佛。香光佛。大燄肩佛。雜色寶華嚴身佛。娑羅樹王佛。寶華德佛。見一切義佛。如須彌山佛。如是等恆河沙數諸佛。各於其國出廣長舌相。徧覆三千大千世界。說誠實言。汝等眾生。當信是稱讚不可思議功德。一切諸佛所護念經。

舍利弗。於汝意云何。何故名爲一切諸佛所護念經。舍利弗。若有善男子。善女人。聞是經。受持者。及聞諸佛名者。是諸善男子。善女人。皆

爲一切諸佛之所護念，皆得不退轉於阿耨多羅三藐三菩提。是故舍利弗，汝等皆當信受我語，及諸佛所說。舍利弗，若有人已發願，今發願，當發願，欲生阿彌陀佛國者，是諸人等，皆得不退轉於阿耨多羅三藐三菩提。於彼國土，若已生，若今生，若當生，是故舍利弗，諸善男子，善女人，若有信者，應當發願，生彼國土。

舍利弗，如我今者稱讚諸佛，不可思議功德，彼諸佛等亦稱讚我，不可思議功德，而作是言：釋迦牟尼佛能爲甚難希有之事，能於娑婆國土，五濁惡世，劫濁、見濁、煩惱濁、眾生濁、命濁中，得阿耨多羅三藐三菩提，爲諸眾生說是一切世間難信之法。舍利弗，當知我於五濁惡世，行此難事，得阿耨多羅三藐三菩提，爲一切世間說此難信之法，是爲甚難。

南无西方极乐世界大慈大悲阿弥陀佛

佛說阿彌陀經終



佛說此經已舍利弗、及諸比丘、一切世間天人、阿修羅等、聞佛所說、歡喜信受作禮而去。

阿彌陀經白話解釋序

淨土法門。實爲十方三世一切諸佛。上成佛道。下化眾生之通規。亦爲末法時代一切眾生。仗佛慈力。卽生了脫之要道。良以如來所說一切法門。無非令眾生出生死。成佛道耳。但以上根者少。中下者多。故能於卽生了脫者。雖在正像。尙不多見。況末法人根陋劣。壽命短促。知識稀少。邪外縱橫之時乎。由是如來豫鑑機宜。特開淨土一門。俾一切若聖若凡。上中下根。同事修持。同於現生往生淨土。上根則速成佛道。下根則亦預聖流。較彼一代所說仗自力法門。下手易而成功高。用力少而得效速。以佛力法力。不可思議。加以眾生信願行力。則無論功夫淺深。罪業輕重。皆得蒙佛慈力。接引往生也。以故如來於諸大乘經。咸皆帶說。如華嚴。法華。楞嚴等。其專說者。則有阿彌陀經。無量壽經。觀無量壽佛經。此三經中。凡彌陀之誓願。淨土之莊嚴。三輩九品之生因。十方諸佛之讚歎。悉皆顯示無遺。而阿彌陀經。言簡義周。最易受持。由是古人列爲日課。無論若宗。若教。若律。皆於暮時讀誦。是舉天下之若僧若

俗無不以淨土爲歸者。然雖如是行持。若不諦審佛祖立法之所以然者。猶然不以求生西方爲事。殆所謂日用不知。習矣不察者乎。卽通宗通教之高人。尙多崇尚自力法門。不肯仰仗佛力。其志固高。其事實難。卽生做到。倘惑業未能淨盡。再一受生。多半迷失。不但所期皆成畫餅。且有因福造業。後生墮落之虞。由是言之。誠堪畏懼。須知淨土法門。爲一代時教中之特別法門。不可以與通途法門並論。若不明此義。以仗自力通途法門之義。疑仗佛力特別法門之益。而不肯信受。則其失大矣。佛說難信。蓋卽指此。若無此執。則誰不信受奉行焉。近來世道人心。陷溺已極。無可救藥。凡有具正知見之偉人傑士。莫不以提唱因果報應。生死輪回。爲挽回狂瀾之據。精修淨業。求生西方。爲究竟安隱之法。一唱百和。無不率從。由是喫素念佛。改惡修善者。日見其多。所可惜者。普通善信。未嘗學問。雖日讀彌陀經。究不知所說者爲何義。縱有疏鈔。要解。等注。亦非彼所能閱。黃智海居士。利人心切。取疏鈔要解之義。以白話解釋之。俾彼稍識字者。亦得憶知經義。由是更加精進。竭誠修持。并以轉化有緣。則現生身心清淨。優入聖賢之域。臨終感應道交。直登極樂之邦。其爲利益。莫能名焉。爰書大

義以貢閱者。

民國十六年丁卯夏曆正月常慚愧僧釋印光謹撰

序二

佛以無上妙慧觀一切眾生知其根性大小不同而以方便智說方便法爲闡提人說十善爲小乘人說四諦爲中乘人說十二因緣爲大乘人說六波羅蜜皆對病根投以良藥此蓋方便教中不易之典也復以徹底大悲鑒六道羣機識其道緣淺深匪一以殊勝異方便智說殊勝異方便法爲上根人說觀想念佛法卽觀無量壽佛經前十二觀皆是也爲中根人說觀像念佛法第十三觀是也爲下根人說稱名念佛法爲最下根業重障深人說臨終十稱念佛卽得往生法第十六觀是也可見佛無棄人惟人自棄耳獨有佛說阿彌陀經之信願持名念佛尤爲方便之方便殊勝之殊勝須知持名有二種持法一者事持但將阿彌陀佛四字蕪直持去持至一心不亂臨終決定往生卽不可以中下根論二者理持正持名時

能知離心無佛。離佛無心。心佛不二。卽是實相念佛。若加信願。臨終上品上生。非最上利根者不能。故知持名念佛。普被三根。無機不攝。至圓頓。最直捷。七日成功。片言卽證。橫超三界。豎徹五時。誠爲稀有難信之法門。故感大方諸佛。異口同音。稱揚勸信。釋迦如來。四辯八音。所親宣也。經中。初則詳陳依正莊嚴。以啓信。中則特勸應求往生。以發願。後則正示執持名號。以立行。一經宗旨。惟信願行。義無餘蘊。文相昭然。嗚呼。時至末法。鈍根者多。五濁繁興。三災頻仍。而此經者。持誦固多。研詳實寡。雖有雲棲疏鈔。靈峯要解。類皆文言法語。自非初機淺識人。能得實益。海上黃子涵之。有鑒於斯。先以淺近苦切之詞。編成白話。說明兩土苦樂形容。俾知此土有三毒。四倒。六道輪回之苦。而生厭離。彼國有七珍。八德。九品蓮華之樂。而生忻慕。詳言彼方。其國無有三途八難。瓦礫泥砂。純以珍寶而爲莊嚴。其人無有九惱十纏。死生老病。純以聖賢而爲眷屬。庶幾初機人。修淨業者。知所趨向。遂命名曰初機淨業指南。出數千部書。風行海內。可謂煞費婆心矣。茲仍以淺近白話文字。取諸祖意。解釋此經。語甚夷易。事出常談。覽其詞。能識其心。識得心。不待境靜。而心自靜。不提心念。而佛自念。可謂大

非陀利法。炬陀羅尼。隨俗而卽俗明真。變淨而以淨覆穢。若空谷之答響。洪鐘不待扣矣。噫。本無言。非言不顯。且此經者。我佛不得已而言之也。言有不達。道無以明。是則前祖之疏。亦不容其已也。言既高深。鈍根難入。今用白話文字。解釋佛經。又寧得而已之哉。余故知白話之淺言。暢經中之深義。既甚便於初機。深有裨於法化。俾彼讀者。由淺而知深。卽近而悟遠。因是書之言。而知疏解之言。因疏解之言。而悟佛經之言。佛言悟矣。信以之而真。願以之而切。持名念佛之行。以之而相續不斷。求生極樂之心。可勇決矣。

時中華民國丁卯夏釋諦閑述於四明觀宗寺之密藏居

阿彌陀經白話解釋說明原因同了看的方法

修行的方法很多。但是有些方法。不是我們這些根機淺薄的人。能彀做得到的。有些方法。做起來很難。很長久。恐怕等不到修成功。修行的心。已經退了。或是修還沒有修成功。人倒已經要死了。還有些方法。做起來。若是不十分明白裏頭的道理。往往就要著魔的。只有這

箇念佛修到西方極樂世界去的方法。最是穩當。最是容易。這箇方法。凡是大乘經裏頭。『甚麼叫做大乘。下邊皆是大阿羅漢一句的解釋裏頭。會講明白的。』都帶說著的。若是專門說這箇方法的。有三部經。一部是無量壽經。一部是觀無量壽佛經。一部就是這阿彌陀經。前二部經。很長的。讀也很不容易。並且經的句子。文理很深。所講的道理。同了修行的方法。又不是人人都能發懂得。都能發得到的。只有這部阿彌陀經。說得最簡便。最明白。所以念佛的人。都要天天念的。但是佛經的文理。是很不容易懂的。雖然從前有許多高明的法師。把這部阿彌陀經。詳細的解釋。可惜都是文理很深的。讀書人還可以懂得。若是不懂文理的善男信女們。就不會明白了。我看見許多念佛的善男信女們。大半都會念阿彌陀經的。但是這些善男信女們。口裏頭儘管念。究竟阿彌陀經講些甚麼。念了有甚麼好處。那就不曉得的多了。有些婦女們。竟然把這部阿彌陀經。看得很輕的。說道念了阿彌陀經。死了去做起鬼來。可以抵得多少錢用。咳。這真是笑話了。阿彌陀經的好處。說也說不盡。那裏只可以抵做錢用呢。況且一箇人死了。總要盼望生到西方極樂世界去。才可以免

得這生了又死，死了又生的無窮無盡的苦惱。那裏可以打這種做鬼的主意呢。我因爲可憐這些善男信女們，白用功夫。所以我把這部阿彌陀經一段一段分開了。再把他一句一句用白話來詳詳細細的解釋明白。並且用兩種方法來解釋。一種解釋叫做解。就是下面前邊一種小字開頭有一箇【解】字的。這是完全照了經的字句，簡簡單單解釋的。但是有好多地方，只不過照字句解釋，還恐怕不明白。一定再要把他的來根，大略說幾句，才會懂得的。這種的解釋，就是下面後邊一種小字開頭有一箇【釋】字的。若是讀這本經的人，只要曉得些大略的意思，那末只要看【解】，倘然要曉得明白些的，那末看了【釋】，再看【釋】，都可以隨便的。不過我雖然用白話來解釋，但是我仍舊照了從前許多很高明的大法師，用文理來解釋的話，把他改做白話罷了。並沒有一句，照我自己的意思解釋的。還恐怕有不妥當的地方，教人看了，倒反誤人。所以又請了普陀山的印光老法師改正過的。你們讀這本經的人，可以放心，不會還有錯誤的了。但願你們看了這本白話解釋的阿彌陀經，大家照這本經上所說的方法，一心一意的，相信西方真有這種極樂世界。時